



საქართველოს გარემოს დაცვისა და სოფლის მეურნეობის მინისტრი

ბრძანება N 2-61

24/01/2020

ქ. თბილისი

ლანჩხუთის მუნიციპალიტეტში, სოფ. ქვემო მამათში ბაზალტის, ანდეზიტ-ბაზალტის და ტუფის ღია კარიერული წესით მოპოვებაზე სკრინინგის გადაწყვეტილების შესახებ

სსიპ წიაღის ეროვნული სააგენტოს მიერ გზშ-ს ჩატარების საჭიროების დადგენის მიზნით საქართველოს გარემოს დაცვისა და სოფლის მეურნეობის სამინისტროში წარმოდგენილია „ლანჩხუთის მუნიციპალიტეტში, სოფ. ქვემო მამათში ბაზალტის, ანდეზიტ-ბაზალტის და ტუფის ღია კარიერული წესით მოპოვების“ სკრინინგის განცხადება.

წარმოდგენილი სკრინინგის განცხადებით დგინდება, რომ საპროექტო ტერიტორია მდებარეობს ლანჩხუთის მუნიციპალიტეტში, სოფ. ქვემო მამათის მიმდებარედ. ადგილის GPS კოორდინატებია (1. X-251730 Y-4658232; 2. X-251936 Y-4658287; 3. X-252182 Y-4657875; 4. X-252319 Y-4657533; 5. X-252138 Y-4657396; 6. X-251911 Y-4657691.)

ერთ უბანზე წარმოდგენილი სალიცენზიო ობიექტი მდებარეობს გურიის მთისწინა, გორაკ-ბორცვიან ზონაში და მოიცავს უსახელო გორაკის თხემურ ნაწილსა და სამხრეთ-აღმოსავლური ექსპოზიციის მქონე ფერდობს, რომლის დახრილობა ობიექტის ფარგლებში არათანაბარია და საშუალოდ 20-35⁰-ის ინტერვალში მერყეობს. სალიცენზიო ტერიტორია ზღვის დონიდან 200-400 მეტრზე მდებარეობს, აღნიშნული ობიექტიდან უახლოესი საცხოვრებელი სახლი მდებარეობს დაახლოებით 300 მეტრზე. მანძილი უახლოესი საავტომობილო გზის ღერძამდე შეადგენს 40 მეტრს.

ტერიტორიის გეოლოგიურ აგებულებაში მონაწილეობს შუა ეოცენური ასაკის კლდოვანი და ნახევრადკლდოვანი ქანები - მასიური ტუფობრეკჩიები, ლავები, ლავაბრეკჩიები და ტუფები ანდეზიტ-ბაზალტის შემადგენლობით, რომლებიც გადაფარულია დელუვიონით და ცვალებადი სიმძლავრის ნიადაგის ფენით. საინჟინრო-გეოლოგიური პირობების სირთულის მიხედვით ობიექტის ტერიტორია მიეკუთვნება I (მარტივი) კატეგორიას. სასარგებლო წიაღისეულის ობიექტის ფართობია - 24,0350 ჰა, საშუალო სიმძლავრე - 4 მ. წიაღისეულის სარგებლობის ობიექტის დამუშავება ხდება ღია კარიერული წესით.

სალიცენზიო ობიექტზე პროგნოზული წიაღისეულის რაოდენობრივი მაჩვენებლებით, მარაგი შეადგენს 961400 მ³-ს. ობიექტიდან მოპოვებული წიაღი გამოიყენება სამშენებლო საქმიანობაში.

სალიცენზიო ობიექტის მთლიანი ტერიტორია მდებარეობს სსიპ ეროვნულ სატყეო სააგენტოს მართვას დაქვემდებარებული ტყის ფონდის ტერიტორიაზე. ზემოაღნიშნული

წარმოადგენს ტყით მჭიდროდ დაფარულ ტერიტორიას, რომელზეც წარმოდგენილია მრავალწლიანი ხეები და ბუჩქნარი, შესაბამისად მოსალოდნელია ბიომრავალფეროვნებაზე მნიშვნელოვანი ზემოქმედება.

სალიცენზიო ობიექტის დამუშავების დროს მოხდება ნაყოფიერი ფენის მოხსნა და შესაბამისად მოსალოდნელია ნიადაგზე მნიშვნელოვანი ზემოქმედება. ობიექტის დამუშავების დროს მოხსნილი ნიადაგის ფენა და ფუჭი ქანები უნდა დასაწყობდეს შემდგომი რეკულტივაციის მიზნით.

სკრინინგის განცხადებაში არ არის დაზუსტებული ინფორმაცია, ობიექტის დამუშავების დროს მოხსნილი ნიადაგის ნაყოფიერი ფენის და ფუჭი ქანების მოცულობების შესახებ.

სალიცენზიო ობიექტის დამუშავების დროს მოსალოდნელია ხმაურის წარმოქმნა და გავრცელება, რამაც შესაძლებელია უარყოფითი გავლენა მოახდინოს გარემოზე და მოსახლეობაზე, ვინაიდან ობიექტიდან უახლოესი დასახლებული პუნქტი დაშორებულია 300 მეტრით. ხმაურის გამომწვევი ძირითადი წყაროები იქნება სატრანსპორტო საშუალებები, რომლითაც უშუალოდ ხდება კარიერის დამუშავება და ტრანსპორტირება.

ღია კარიერული წესით მოპოვების დროს მოსალოდნელია ატმოსფერული ჰაერის დაბინძურება და ატმოსფერულ ჰაერში მტვრის გავრცელებას ადგილი ექნება, როგორც მოპოვებითი სამუშაოების წარმოების პროცესში, ასევე ნედლეულის ტრანსპორტირებისას.

სკრინინგის განცხადების თანახმად, სალიცენზიო ობიექტის ტერიტორია შესწავლილი არ არის და საპროექტო ტერიტორიის დახასიათება მოცემულია ლიტერატურულ წყაროებზე დაყრდნობით.

სკრინინგის განცხადების თანახმად სალიცენზიო ობიექტიდან 160-165 მ-ში ფიქსირდება დაკაპტაჟებული წყაროს გამოსავალი, (ბეტონის ავზი), რომლითაც სარგებლობს ადგილობრივი მოსახლეობა, შესაბამისად წიაღისეულის მოპოვებამდე ზემოაღნიშნული საკითხი საჭიროებს შეთანხმებას შესაბამის სამსახურთან.

ვინაიდან აღნიშნული სალიცენზიო ობიექტი დიდ ფართობს მოიცავს (240350 მ²), აგრეთვე სალიცენზიო ობიექტის მთლიანი ტერიტორია მდებარეობს სსიპ ეროვნულ სატყეო სააგენტოს მართვას დაქვემდებარებული ტყის ფონდის მიწაზე და წარმოადგენს ტყით მჭიდროდ დაფარულ ტერიტორიას, რომელიც დაფარულია მრავალწლიანი ხეებით და ბუჩქნარით მოსალოდნელია ბიომრავალფეროვნებაზე და გარემოს სხვადასხვა კომპონენტებზე მნიშვნელოვანი ზემოქმედება.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსის“ მე-7 მუხლის მე-6 ნაწილის და ამავე კოდექსის II დანართის 2 პუნქტის 2.1 ქვეპუნქტის საფუძველზე,

ვ ბ რ ძ ა ნ ე ბ:

1. მიღებულ იქნეს სკრინინგის გადაწყვეტილება, რომ ლანჩხუთის მუნიციპალიტეტში, სოფ. ქვემო მამათში ბაზალტის, ანდეზიტ-ბაზალტის და

ტუფის ღია კარიერული წესით მოპოვება დაექვემდებაროს გარემოზე ზემოქმედების შეფასებას;

2. სასარგებლო წიაღისეულის ლიცენზიის მფლობელი ვალდებულია საქართველოს კანონის „გარემოსდაცვითი შეფასების კოდექსის“ მე-8 მუხლის შესაბამისად უზრუნველყოს სკოპინგის პროცედურის გავლა;
3. ბრძანება დაუყოვნებლივ გაეგზავნოს სსიპ „წიაღის ეროვნულ სააგენტოს“;
4. ბრძანება ძალაში შევიდეს სსიპ „წიაღის ეროვნული სააგენტოს“ მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში აღნიშნული გადაწყვეტილება განთავსდეს სამინისტროს ოფიციალურ ვებგვერდზე და ლანჩხუთის მუნიციპალიტეტის აღმასრულებელი ან/და წარმომადგენლობითი ორგანოს საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრი